

## Akinafarir Pol Efesusin Nguibamin itir Sios bagha Osirizim

### *Akar Faragha Zuim*

Akinafarir kamin akar mingarim a kamakin, God kamaghin nighnisi, an overiam ko nguazimin ingarizir biziba bar, dar amu da isi Kraisin apengan dar arigham. Eghti Kraisi biziba bar dar dapanimin ikiam (1:10). Ezi God kamaghin ifonge, a uan gumazamiziba gaghuvkinti, eghti me bar Kraisi ko poroghiv ikiva egh me navir vamira ikiam.

Ezi akinafarimin aven faragha itir akaba, Pol Godin apangkuvimin migirigiar aviribagh ami. A ghaze, God gumazamizibagh amima, me bar nighnizir gavgavim Kraisin ikiava uari akuvagha, egha ikizir vamiran gumazamizibar otifi. Iesusin ingangarimin, God ua gumazamiziba inigha, egha Godin Duam me ganingi. Ezi tuavir kamin me bar fo, me Godin akar dikirizimin bizir mikemeziba, me bar da iniam (1:14).

Egha akinafarimin itir namba 2in akar otevimin, Pol kamaghin migia ghaze, Kraisin adarasi me Kraisi ko poroghav iti. Kamaghin, me bar navir vamira ikiva, egh Godin arazibar gin mangi.

Ezi akinafarir kamin Pol akar isin zuibar migiava, egh kamaghin men akakaghti me kamaghin fogh suam, me Kraisi ko poroghav ikia egha ikizir vamiran gumazamizibar oto. A kamaghin mikeme, Godin gumazamiziba, me nivafizir vamiran min oto, ezi Kraisi mati nivafizir vamiran kamin dapanim. (4:1-16). Ezi uaghan, Godin gumazamiziba mati dipenir mam, ezi Kraisi, a mati dipenir kamin guarir akinim (2:19-22). Egha Godin gumazamiziba

mati amizir mam, ezi Kraiſ mati amizir kamın pam (5:22-32). Ezi akınafarir kamın aven e bar deravira bizir aghuir God uan gumazamizibar amuamibar gari.

**E Kraiſ**ın poroghav itima, God e gamizi e gumazamizir igiabar otifi

*(Sapta 1-3)*

<sup>1</sup> Ki Pol, God uan ifongiamin ġin ghua Kraiſ Iesusin aposelin ikiasa na miſefe. Ia, Efesusin itir Kraiſin adarasi, ia Kraiſ ko poroghava ikia deraghavira an ġin zui. Ki ia bagha akınafarir kam osirigha anemadi. <sup>2</sup> Ki kamagh sua, God en Afeziam ko Kraiſ Iesus en Ekiam, aning apangkuvim ko navir amirizim ia daningam.

*E Kraiſ Iesusin* poroghav itima, God uan Nguibamin itir bizir aghuiba bar da isava e ganidi

<sup>3</sup> E Kraiſ Iesusin poroghav itima, ezi tuavir kamın God deravira e gamua en duabar akurvaghasa uan Nguibamin otivir bizir aghuiba e ganidi. Kamaghin amizi, e God minabagham, a en Ekiam Kraiſ Iesusin Afeziam ko an God. <sup>4-5</sup> Dughiar God tighar nguazir kamın ingaramim, a kamaghin ifonge, e a baghivira itir gumazamizibar ikiva, an damazimin arazir kuratam ikian kogham, egha a fomira e ginaba. Egha ghaze, e Kraiſ ko poroghiv iki, egh tuavir kamın e an gumazamizibar min otogham. A fomira bar e gifongegha egha e ginabagha ghaze, a Kraiſ Iesusin ingangarimin tuavimin e damighti, e an boribar otivigham. God uan bar akongezir arazim ko uan ifongiamin ġin ghua bizir kam gami. <sup>6</sup> A ifongezir Otaramin ziamin, a bar pura bizir aghuimin min uan

---

1:1: Ap 18:19-21, 19:1, Ro 1:1, 1:7, 1 Ko 1:1, Kl 1:1      1:2: 2 Ko 1:2, Ga 1:3, Kl 1:2, Ta 1:4      1:3: Ef 2:6      1:6: Mt 3:17, Jo 3:35, Ro 3:24, 5:15, Kl 1:13

apangkuvim isa e ganingi. Kamaghin e apangkuvir bar ekjar kam ginighnighiva, egh Godin ziam fam.

<sup>7-8</sup> E fo, Kraisin ovevem in God uam e ini, egha en arazir kuraba gin amada. Godin apangkuvim guizbangira bar ekeveggha izifa. Kamaghin a uan apangkuvim e gufusfuzima an e girava, fofozir aghuim ko nighnizir aghuim e ganidi. <sup>9</sup> God fomira uan ifongiam in gin ghua, Kraisin ingangarimin tuavimin uan nighnizir mogomem azenim darighasa nighniki. Ezi a datirighin an nighnizir mogomer kam a en akazi an azenan oto. <sup>10</sup> Godin nighnizir kam a kamakin, a ingarizir biziba bar dar amuti da mangiva dughiar a inabazimira a da isi Kraisin apengan dar arigham. Overiam in itir biziba ko nguazimin itir biziba sara bar. Eghti Krai biziba bar dar dapanimin ikiam.

<sup>11</sup> God uan ifongiam ko nighnizimin gin ghua, bizibagh amima da otifi. A faraghavira uan nighnizimin gin ghua, e Krai ko porogh egh an gumazamizibar min ikiasa, an e amisefe. <sup>12</sup> E Judaba, e faraghavira Krai mizuava an gin zuir gumazamiziba, e Godin ziar ekiam bar a pirafam.

<sup>13</sup> Ezi ia Kantrin Igharazibar Gumaziba uaghan, ia guizin akam baraghizima God ia gamizi ia an gumazamizibar otifi. Akar aghuir kamra kara: God ian akurvasi. Ia nighnizir gavgavim Kraisin itima God uan Duam ia gati. Kamaghin me fogh suam, ia an gumazamizibara. Kar Godin Duar a fomira akar dikirigha amizim. <sup>14</sup> E Godin Duam inigha gifa, kamaghin e bar fo, e bizir God akar dikirizimin uan gumazamizibav kemeziba, e bar da iniam. Bizir kam in e fo, God uan gumazamiziba damighti me

---

1:9: Ro 16:25, Ef 3:4, 3:9-11, Kl 1:26, 2 Ti 1:9      1:10: 1 Ko 3:22-23, Ga 4:4, Fl 2:9-10, Kl 1:16, 1:20, Hi 1:2, 1 Pi 1:20      1:11: Ro 8:17, 8:28-29, Kl 1:12, Ta 3:7, Je 2:5, 1 Pi 1:4      1:13: 2 Ko 1:22, 6:7, Ef 4:30, Kl 1:4-6      1:14: Lu 21:28, Ro 8:23, 2 Ko 1:22, 1 Pi 2:9

guizbangira firighregham. Kamaghin e Godin ziar ekiam bar a pirafam.

*Pol God ko migia* ghaze, God fofozim Efesusin sios daningam

<sup>15</sup> Ki fo, God bizir kabanang gami, ezi ki orasi, ia nighnizir gavgavim Ekiam Iesusin ikiava, Godin gumazamiziba bar me gifonge, <sup>16</sup> kamaghin amizi, ki zurara ia ginighnigha God ko migia ia bagha God minabavira iti. <sup>17</sup> Egha ki Godin azangsis, en Ekiam Kraiss Iesusin God, Afeziar ziar ekiam itim, ki an azangsigha ghaze, a uan Duam ia danighti a ia damuti, ia fofozir aghuim iniam. Eghti Godin Duam uan guizin akam ian akaghti, ia deragh Godra fogham. <sup>18</sup> Ki kamaghin Godin azangsis, ian nighnizim kuighrighti ia Godin angazangarimin ganam. Egh ia kamaghin fogham, God ian diazima ia bizir aghuir ia fogha iniamiba da bagha mizuai iti. Egh kamaghin fogham, bizir aghuir God uan gumazamizibar aningamiba, da bar ekevegha pin ko. <sup>19-20</sup> Egh ia kamaghin fogham, Godin gavgavim zurara en navibar aven ikia ingara en akurvasi, e nighnizir gavgavim an itiba. Gavgavir kam, guizbangira bar ekefe, e guizbangira an gavgavim tuisiva avegham. Gavgavir en aven ingarir kamra, dughiar Kraiss ovengezimin, God gavgavir kamin Kraiss gamizi, a ua dikafi. Egha a inigha uan Nguibamin ghua a isa uan agharir guvimin amadaghan anefa. <sup>21</sup> Kamaghin Kraiss Godin Nguibamin ikia egha duar gavgaviba itiba bar, ko gumazir dapaniba, ko gavmanin gumaziba, ko atriviba, a bar men gavgavibagh afiragha me gatifa. Egha Ziar Kraiss uan ingangarim bagha inizim a ziar manaba, manaba bar dagh afira, dughiar kamin ziaba ko dughiar tighar

---

1:15: Kl 1:4      1:16: Fl 1:3-4, Kl 1:3, 1 Te 1:2      1:17: Kl 1:9      1:18: Ap 26:18, Ef 2:12, 4:4, Kl 1:12      1:21: Ro 8:38, Fl 2:9-10, Kl 2:10, 2:15, Hi 1:4

izamimin ziaba bar. <sup>22</sup> God biziba bar dagh amizima da Kraisin apengan iti. Egha a gamizi, a sios bagha biziba bar dar dapanimin oto. <sup>23</sup> Sios mati Kraisin namnam. Ezi Krai biziba bar dar aven ikia bar dagh izifa. Egha Krai uan siosin aven ikia bar a gizifa.

## 2

*E gumazamizir ariaghreziba, God e gamizi e Krai ko angamra iti*

<sup>1</sup> Ia fomira Godin akam barazi puvatigha arazir kurabagh amuava, kamaghin ian duaba guizbangira aremezi moghin iti, mati gumazamizir ariaghreziba. <sup>2</sup> Faragha zuir dughiamin, ia nguazir kamın arazir kurabar gin zui. Egha ia duar kurar overiamin itibar atrivim, ia an akam baregha an gin zui. Duar kurar kam, gumazamizir Godin akam barazi puvatizibar navir averiabar aven ingari. <sup>3</sup> Fomira e bar moghira men min ami, egha uan navir ghurimin ifongiamin gin zui. E uan nivafizir agorogem ko uan nighnizir kurabar gin zui. Dughiar kamın e nguazimin itir gumazamizibar min amima, kamaghin God bar en arazir kuraba bagh ivezir kuram e daningasa nighnizim gami. <sup>4-5</sup> Guizbangira, en arazir kuraba e gamizi en duaba guizbangira aremezi moghin iti, mati gumazamizir ariaghreziba. Ezi God bar e gifongezi, an apangkuvir dafam bar e avara. Kamaghin an e gamizi e Krai ko angamra iti. God uan apangkuvimin tuavimra, a en akura. <sup>6</sup> A kamagh sua, e Krai Iesus ko Godin Nguibamin atrivimin ikiam. Kamaghin an e gamizi

---

1:22: Sng 8:6, Mt 28:18, Kl 1:18, Hi 2:7      1:23: Ro 12:5, Ef 4:10, 4:15, Kl 2:9, 3:11      2:1: Ef 4:18, Kl 1:21      2:2: Jo 12:31, Ef 5:6, 6:12, Kl 1:21, 3:6-7, Ta 3:3  
 2:3: Ro 5:12, Ga 5:16, Kl 3:6, Ta 3:3, 1 Pi 4:3      2:4-5: Lu 15:24, 15:32, Ap 15:11, Ro 5:6-10, 6:4-5, 6:13, 10:12, Ef 1:7, 2:1, 2:7, Kl 2:12-13      2:6: Ef 1:20, Kl 2:12

e Krai ko poroghav ikia, a ko ua dikafi. <sup>7</sup> A kamagh sua, a uan apangkuvir bar dafam, tighar izamin dughiabar gumazamiziba bar men akaghasa. Eghti me fogh suam, a Krai Iesusin ingangarimin tuavimin a bar me gifonge. Kamaghin an arazir aghuir kamin e gami. <sup>8-9</sup> Ia nighnizir gavgavim Godin itima, ezi a uan apangkuvimin tuavimra ian akurvasi. Kar ia uari amizir puvatizir bizim. Puvati. God pura ia ganingi. Kar ian ingarimin ivezim puvati. Kamaghin bizir kam bagh gumazitam uabi uan ziam fan marki. <sup>10</sup> God fomira e bagha, ingangarir aghuir e gin damuamiba, a dagh nighnigha da ati. A kamagh sua, e ingangarir kabar amuasa, egha kamaghin an e gamizi, e Krai Iesus ko poroghav ikia datirighin gumazamizir igiabar otifi.

*Krai apanim gamir arazim a givazi*, ezi Judaba ko Kantrin Igharazibar Gumaziba ikizir vamira iti

<sup>11</sup> Ia Kantrin Igharazibar otivir gumaziba, ia kamaghin fo, Judaba, uan gumazibar mikarzir mogomebar aghori. Egha me kamaghin ia dibori, ia gumazir mikarzir mogomebar aghorir puvatiziba. Arazir kam kamakin, gumaziba uari uan mikarzir mogomebar aghori. Eghti ia deravira nighnigh, ia fomira Kantrin Igharazibar Gumazibar min ike. <sup>12</sup> Dughiar kam ia Kraisin saghon iti. Ia Israelin gumazamizibar azenan iti, kamaghin ia nguibar igharazibar gumazibar min iti. God uan adarasi ko akam akirigha, egha uan gumazamiziba akar gavgavir dikirizim me ganingi. Ezi ia akar gavgavir dikirizir kamin aven itir puvati. Ia nguazir kamin ikiava God gifozir puvatigha, egha ia bizir aghuir mizuai iti tam itir puvati. <sup>13</sup> Ia faragha

---

2:7: Ef 1:7    2:10: 1 Ko 3:9, 2 Ko 5:5, 5:17, Ef 4:24, Ta 2:14    2:11: Ro 2:28-29,  
1 Ko 12:2, Ef 5:8, Kl 1:21    2:12: Ro 9:4, 9:8, Ga 4:8, Ef 4:18, Kl 1:21, 1 Te 4:5,  
4:13    2:13: Ga 3:28, Ef 2:17, Kl 1:20

saghon iti, ezi datirighin Kraisin ghuzim ia ruegha egha ian akua izezi, ezi ia Krai Iesus ko poroghav ikia, Godin boroghin iti.

<sup>14</sup> Krai uabi e gamizi e navir amirizim ikiava deravira uari inigha iti. Fomira Judaba ko Kantrin Igharazibar Gumazamiziba uarir apanim gami. Ezi arazir kam a divazimin min men tongin ikia me abiki. Ezi Krai uan ovevemin tuavimin divazir kam anakariaghatigha egha apanir arazir kam agifa. Ezi Judaba ko Kantrin Igharazibar Gumaziba ikizir vamiram oto. <sup>15</sup> Krai, Moses Osirizir Araziba, ko akar gavgaviba, ko arazir me anogorogheziba sara bar da gifa. A ghaze, a kamaghin damigh, ikizir pumuning damuti, aning a ko porogh ikiva egh ikizir igiar vamiran otogham. A tuavir kamin an e gamizi e navir vamira iti. <sup>16</sup> Krai ter ighuvimin aremegha egha tuavir kamin ikizir pumuning gamizi aning ikizir vamiran oto. Egha uam aning inigha God bagha ize. Egha an ovever tuavir kamra me uarir apanim gamir arazim anegifa. <sup>17</sup> Kamaghin Krai izeghava akar aghuim gumazamiziba bar me mikira ghaze, ia navir vamira iki. A, gumazamizir Godin saghon itiba ko gumazamizir Godin boroghin itiba bar, akar aghuim me mikiri. <sup>18</sup> Kamaghin Kraisin ingangarimin tuavimra e bar, Judaba ko Kantrin Igharazibar Gumaziba, Godin Duam en akurvazima e uari akuvagha Afeziamin boroghin izi.

*E Kraisin adarasi, e mati Godin Dipenimra*

<sup>19</sup> Kamaghin amizi, datirighin ia Kantrin Igharazibar Gumaziba, ia ua kamaghin nighnighan marki egh suam, ia

---

2:14: Ais 9:6, Mai 5:5, Jo 16:33, Ap 10:36, 1 Ko 12:13, Kl 1:20, 2:14      2:15: 2 Ko 5:17, Ga 6:15, Ef 4:24, Kl 1:20-22, 2:14, 2:20      2:16: Sek 9:10, Ro 6:6, 8:3, Kl 1:20, 2:14      2:17: Ais 57:19, Sek 9:10, Ap 2:39, Ro 5:1      2:18: Ro 5:2, 1 Ko 12:13, Ef 3:12, Hi 4:16, 1 Pi 3:18      2:19: Ga 6:10, Ef 3:6, Fl 3:20, Hi 12:22-23

nguibar igharazibar gumazamiziba o nguibaba puvatizir gumazamiziba. Puvati. Ia Godin adarasi ko uaghara ghu, egha uaghan Godin gumazamizibar tongin itir marasi. <sup>20</sup> Ia uaghan mati God ingarizir dipenimin min iti. Gumazim dipenim ingarasa ter akiniba kuazizi moghin, God aposelba ko uan akam inigha izir gumaziba me amisevezi me an tuivigha ingangarim gami. Ezi Krai Iesus, a uabi dipenir guarimin min iti. <sup>21</sup> Dipenir guarim a dipenir agharim bar a gupuzi moghin, Krai bar e isafuragha e gamima e aghua, ghuava God baghavira itir dipenimin oto. <sup>22</sup> Ia uaghan Krai ko poroghav iti, ezi God igharaz darazi ko ia isafuragha ia gamizi, ia guizin Godin Dipenimin min oto. Ezi Godin Duam dipenir kamin aven iti.

### 3

*Pol Kantrin Igharazibar Gumazibar tongin akar aghuim akunamin ingangarim gami*

<sup>1</sup> God guizbangira deravira ia gami. Ezi bizir kam bagha ki Pol, ki Krai Iesusin ingangarim gamua egha ia Kantrin Igharazibar Gumaziba ian akurvagha, kamaghin ki kalabusin iti. Egha ki ia bagha God ko migei. <sup>2</sup> Ia ti oreghama, God apangkuvim ikia ia bagha ingangarir kam na ganingi. <sup>3</sup> Egha God uan nighnizir mogomem azenan aneka, egha na gamizi, ki a gifo. Ki mong an gun osiri, <sup>4</sup> eghti ia migirigiar ki osirizibar ganiva fogh suam, ki Krai amizir ingangarimin nighnizir mogomem, ki bar a gifo. <sup>5</sup> Faragha zuir dughia, God gumazamiziba nighnizir mogomer kamin me mikemezir puvati. Ezi datirighin God uan Duamin tuavimin uan aposelin a baghavira itiba ko an akam inigha izir gumazibar akazi an azenim giri.

---

2:20: Mt 16:18, 1 Ko 3:9-11, Ga 2:9, MAA 21:14      2:21: 1 Ko 3:16-17, 2 Ko 6:16, Ef 4:15-16, Kl 2:19      2:22: 1 Pi 2:5      3:1: Ef 4:1, Fl 1:7, 1:13, Fm 1, 9  
3:2: Kl 1:25      3:3: Ef 1:9-10, Kl 1:26



<sup>6</sup> Nighnizir mogomer kam a kamakin: Akar aghuimin aven Kantrin Igharazibar Gumaziba ko Judaba uaghara, God uan bizir aghuiba isa bar moghira me ganidi. Me uari ko ikia mati nivafizir vamiran aven iti. Me bar moghira, Kraiss Iesusin ingangarimin tuavimin, bizir God e bagha akam akiriziba e da iniam.

<sup>7</sup> Godin apangkuvimin tuavimin, a bizir aghuir kam pura na ganingi, egha a na gamizi an gavgavim nan aven ingari, ezi ki akar aghuimin ingangarir gumazimin oto. <sup>8</sup> Ki, Godin gumamazizibar abuan itir gumazim, ki bar an gin iti. Ezi God bar nan deragha Kantrin Igharazibar Gumaziba akar aghuim akunasa ingangarir ekiar kam na ganingi. Akar aghuir kam, a Kraissin bizir aghuibar gun migei. Bizir aghuir kaba, gumaziba dagh nighnigh da tuisighiva avegham. <sup>9</sup> God biziba bar dar ingari, egha faragha zuir dughiba uan nighnizir mogomem men ghuara. Egha iza datirighin a uan nighnizir mogomem aghurasa, ingangarir kam na ganingi, eghti ki gumamaziziba bar me damuti me God damuamin araziba bar dagh fogham. <sup>10</sup> God kamagh sua, datirighin dughiar kam a uan sios damuti, eghti sios, enselba ko duar gavgavir overiamin itibar amuti, eghti da an fofozir aghuimin tuavir aviriba dagh fogham. <sup>11</sup> God fomira bizir kam damuasa nighniki egha datirighin en Ekiam Kraiss Iesusin ingangarimin an a gamizi an oto. <sup>12</sup> E Kraiss ko poroghav ikia nighnizir gavgavim an iti, egha tuavir kam in e Godin boroghin mangasa gavgavigha, atiatir puvati. <sup>13</sup> Ki pamtem ia gakaghori, ia osimtizir ki ia bagha aterir kam, ia a ginighnigh osiman marki. Guizbangira ki

---

3:6: Ga 3:14, 3:28-29, Ef 2:13-19      3:7: Kl 1:23-25      3:8: 1 Ko 15:9-10, Ga 1:16, Ef 1:7, Kl 1:27, 1 Ti 1:13-15      3:9: Ro 16:25, 1 Ko 2:7, Ef 1:9, Kl 1:16, 1:20, Hi 1:2      3:10: Ro 8:38, 11:33, Ef 1:21, 1 Pi 1:12      3:12: Jo 14:6, Ro 5:2, Ef 2:18, Hi 4:16      3:13: Kl 1:24

ian dabirabir aghuarim bagha osımtızir kam ateri.

*Pol Efesusin* nguibamin itir sios bagha God ko migei

<sup>14</sup> Ki bizir Afeziam amizir kabagh nighnigha, egha an damazimin uan tevimning apiri. <sup>15</sup> A uan Nguibamin itir ikiziba ko nguazimin itir ikiziba bar, a bar men Afeziam. Egha vaghvagha ziaba me gariki. <sup>16</sup> Ezi ki bizir kam bagha Godin azangsigha ghaze, God bizir aghuir an Nguibamin otivir taba ia daning, eghti an Duam gavgavim ia daningti, ian navir averiaba gavgavigham. <sup>17</sup> Ki kamaghin Godin azangsi, ian nighnizir gavgavimin tuavimin Krai zurara ian navir averiabar ikiam. Eghti igharaz darazigh ifongezir arazim, a ian navir averiabar aven iki gavgavigh ia damuti, eghti ia tuivigh gavgavigh, mati nguazim temer bibar suirazi temem tugha gavgavigha aghui. <sup>18</sup> Egh ia Godin gumazamizir igharaziba ko, gavgavim iniva deravira fogham, Krai gumazamizibagh ifongezir arazim bar ekevegga, bar pin ghuavanaga, bar ruarvagha, egha bar vin uaghiri. <sup>19</sup> Guizbangira God gumazamizibagh ifongezir arazim a gumazibar fofozim bar a gafira. Eghti ia guizbangira arazir kam gifogham. Eghti bizir aghuir God gizivaziba, uaghan bar ia gizivagham.

<sup>20</sup> Godin gavgavim en navir averiabar ingari, ezi gavgavir kam bar en nighnizibagh afira. Bizir God damuasa e an azangsiziba, o bizir e God damuasa e nighniziba, da mati pura biziba, an gavgavim bar dagh afira. <sup>21</sup> Kamaghin dughiaba bar, e siosin aven itir gumazamiziba Krai Iesus ko poroghiv iki, zurazurara Godin ziam fam! Bar guizbangira.

---

3:15: Ef 1:10, Fl 2:9-11    3:16: Ro 9:23, 2 Ko 4:16, Fl 4:19, Kl 1:11, 1:27    3:17: Jo 14:23, Ef 2:22, Kl 1:23, 2:7    3:20: Ro 16:25, 1 Ko 2:9, Kl 1:29    3:21: Ro 11:36, 16:27, Hi 13:21

## E mati Kraisin nivafizimin min iti, kamaghin e Godin arazibar gin mangam

### 4

*(Sapta 4-6)*

*E Kraisin adarasi, e Kraisin nivafizimin min iti*

<sup>1</sup> Ki Pol, ki Ekiamin ingarim gamua, kamaghin ki kal-abuziamin iti. Ki fo, God ian diagha ghaze, ia an arazir bar pin itibar gin mangi. Kamaghin amizi, ki mighighavira ia migia ghaze, ia bar deraghvira Godin arazir kabar girara mangi. <sup>2</sup> Ia igharaz darazir apengan iki, egh men asughasugh, egh dughorir amirizimin iki, egh osimtizir me ia gariziba, da ateriva, egh tuavir kamin bar me gifongegh. <sup>3</sup> Godin Duam e gamima e navir amirizim iti. Egha tuavir kamin arazir navir vamiran ikiamim e ganingi. Ezi arazir kam benimin min e ikegha gavgavizi e ikizir vamiran iti. Kamaghin amizi ia arazir kam an suiragh gavgafigh. <sup>4</sup> E fo, e uari inigha nivafizir vamiran min iti. Ezi Godin Duar vamira iti. Ezi kamaghira, God ian diagha ghaze, a bizir vamira ia a daningam, eghti ia a baghivira mizuamam. <sup>5</sup> Ezi en Ekiar vamira iti. Ezi nighnizir gavgavir arazir vamira iti. Ezi rurir arazir vamira iti. <sup>6</sup> Ezima Godin vamira iti. A bar moghiram en Afeziam. A gumazamiziba bar me gatifa, egha a men tongin ingara egha men aven iti.

<sup>7</sup> E fo, Krai vaghvagha bar en apangkufi. Egha kamaghira uan apangkuvir ekiamin abaragha an mirara, a bizir bar aghuim vaghvagha e ganingi. <sup>8</sup> Godin Akinafarim kamaghin mikeme,

---

4:1: Ef 3:1, Fl 1:27, Kl 1:10, 1 Te 2:12, Fm 1, 9      4:2: Ap 20:19, Ga 5:22-23, Kl 3:12-13      4:3: Kl 3:14-15      4:4: Ro 12:5, 1 Ko 12:4, 12:11-12, Ef 1:18, 2:16-18  
 4:5: Jo 10:16, 1 Ko 1:13, 2 Ko 11:4, Ga 3:27-28, Hi 6:6      4:6: Ro 11:36, 1 Ko 12:6      4:7: Ro 12:3, 12:6, 1 Ko 12:11      4:8: Sng 68:18, Kl 2:15

“A bar pîn ghuavanabogha,  
kalabuziar bar avirim inigha uabin gin ghu.  
Egha bizir bar aghuiba pura gumazamizibagh aningi.”

<sup>9</sup> Akar kam, “A ghuavanabo,” a kamaghin en akazi e fo, Kraisa a faragha nguazir bar vin mar itim giraghu.\*  
<sup>10</sup> Egha gumazir faragha iraghuzir kam, a uaghan pîn ghuavanaga, uabi isi biziba bar dagh izivaghasa, kamaghin an overiar bar pîn itimin ghuavanabo. <sup>11</sup> Gumazir kamra a “bizir bar aghuiba pura gumazamizibagh aningi.” A bizir aghuir kaba me ganingi, marazi an aposelin ingangarim me ganingi. Egha marazi, Godin akam inigha izir gumazimin ingangarim me ganingi. Egha marazi, Godin akar aghuim akunamin ingangarim me ganingi, egha marazi, Godin gumazamizibar ganamin ingangarim me ganingi, egha marazi, gumazamizibar God ifongezir arazibar men sure damuamin ingangarim me ganingi.  
<sup>12</sup> Kraisa kamaghin ifonge, e Godin gumazamiziba a en akuraghti e a bagh ingangarir aghuibar amuam. Eghti kamaghin e Kraisin nivafizimin otogh gavgavigh deravira ikiam. Kamaghin a bizir aghuir kaba e ganingi. <sup>13</sup> Eghti ingangarir kam mamaghira iki mangiti en nighnizir gavvim bar gavgavighti bizir kam e damuti e bar moghira navir vamira ikiamin arazim inigh, egh e Godin Otaram guizbangira bar a gifogham. Kamaghin damighti e Kraisin gin zuir darorir kamin aven, e tugh gavgavighiva aghung mangi, gumazir aruabar avaghiva egh e guizbangira Kraisin min otogham.

---

4:9: Jo 3:13      \* 4:9: (4:9) Fofozir gumazir maba, akar kam giragha ghaze, “A faragha nguazir kam bar an vin izaghiri.”      4:10: Hi 4:14, 9:24      4:11: Ro 12:7, 1 Ko 12:28, 2 Ti 4:5      4:12: 1 Ko 12:7, Ef 1:23, 2 Ti 3:17      4:13: 1 Ko 14:20, Kl 1:28, 2:2

<sup>14</sup> E ua boribar min ikian kogham. Ia fo, gumazir ifavariba, me gumazibagh ifara me gamima me tuavir kurabar zui. Eghti men migirigiar ifavariba uaghan ia munamangan kogham, mati ongarim ko aminim kurim givai. <sup>15</sup> E men migirigiar ifavariba baraghan kogham. E igharaz darazigh ifongezir arazim damuva egh guizin akabar me mikimam. Eghiva e Kraisin mirara aghungiva a ko poroghiv ikiti an en dapanimin ikiam. <sup>16</sup> A en dapanimin itima en soroghafariba ko damaziba ko nivafizimin bizir maba sara dar min iti. Egha an e gamima e nivafizimin aven bar uari isavsuira. Ezi mati nivafizimin aven itir tevir agiriba ko aghariba uari isavsuighizi moghin, an e gamima e uari isavsuiki, egha bar uarigh ifongezir arazim gami. E vaghvagha uan ingangarir aghuim gamua, kamaghin nivafizir kam uabi aghua ghua gavgafi.

*Kraisin* adarazi arazir igiabar gintigh

<sup>17</sup> Kamaghin amizi, ki Ekiamin ziamin akar mam pantem kamaghin ia mikimasa. Ia uam gumazir Ekiam gifozir puvatizibar arazibar gintighan marki. Men nighniziba, mingariba puvati. <sup>18</sup> Egha men nighniziba mati me mitatemin iti. Egha me fofoziba bar puvatigha men naviba bar gavgafi, kamaghin me Godin ikirimirimin azenan iti. <sup>19</sup> Me arazir kurabagh amuavira ikiava egha datirighin uam aghumsiziba puvati. Me bar uari isa arazir kurabagh aningi, egha me arazir mizirizir avirir igharazibar amusi bizitam men suiraghan kogham.

<sup>20</sup> Ezi ki ghaze, ia Kraisin guizin akam baraghizir dughamin, me bizir kurar kabar ian sure gamizir puvati. <sup>21</sup> Ia guizbangira Kraisin akam baregha gifa. Ezi ia an gin zuir

---

4:14: Ais 28:9, 1 Ko 14:20, 2 Ko 2:17, Hi 13:9      4:15: Ef 1:22, 4:25, Kl 1:18, 1 Jo 3:18      4:16: Kl 2:19      4:17: Ro 1:21, 1 Pi 1:14      4:18: Ap 26:18, Ga 4:8, Ef 2:12, 1 Te 4:5      4:19: Kl 3:5

darasi, me guizin akamin ian sure gamigha gifa. Guizin akar kam, a Iesusin aven iti.

<sup>22</sup> Ia fomira uan navir ghuribar arazibar gin zuima da ia gamima ia arazir ifavariba ko arazir kurabar amuasa navim dikava, egha ia gasighasisi. Ezi datirighin ia navir ghurim ateghiva mati gumazim korotiar ghurim sue. <sup>23</sup> Egh ian nighniziba ko navibagh iragha bar igiabar otifigh. <sup>24</sup> Ia navir igiaba inigh mati gumazim korotiar igiam aru. God uabi navir igiar ian aven itibagh amizi ia an min otifi. Eghti gumaziba bar ian gan fogham, ia Godin damazimin deragha egha a baghavira iti.

<sup>25</sup> Kamaghin ia ifavarir arazim atakigh. E bar moghira Kraisin nivafizimin soroghafariba ko an bizibar min iti. Kamaghin amizima, ia vaghvagh Kraisin adarazi guizin akabara me mikim.

<sup>26</sup> Egh ia atar, ia uaribagh ganigh, egh ia arazir kuratam damighan kogham. Ian adarim ikivira ikiti aminim piran marki. <sup>27</sup> Ian adarim zuamira givaghan koghti, kamaghin ia Satan bagh tiam kuighti a ian nighnizibagh asighasigham. Ia kamaghin damuan marki.

<sup>28</sup> Okimakiar gumaziba uam okiman marki. Me uari uan dafaribar ingangarir aghuibar amu. Egh uaghan gumazamizir onganarazibar akurvaghisi, ingariva bizir taba inigh me daning.

<sup>29</sup> Eghti akar mizirizir kuraba ian akabar otivan marki. Ia gumazamizibar akurvaghamin akabara ia dav kim. Akar aghuir igharaz darazi gavgavim me daningamibara, dar ian akabar otiv. Egh akar ia migeir kaba, da gumazamizir ia barazibar akurvagham.

---

4:22: Ro 6:6, 8:13, Ef 2:2-3, 4:17, Kl 3:9, Hi 12:1, 1 Pi 4:3      4:23: Ro 12:2, Kl 3:10      4:24: Stt 1:26, Ro 6:4, Ef 2:10, Kl 3:10      4:25: Sek 8:16, Ro 12:5, Kl 3:8-9      4:26: Sng 4:4, Je 1:19-20      4:27: 2 Ko 2:10-11, Je 4:7, 1 Pi 5:9      4:28: 1 Te 4:11, 2 Te 3:8, 3:11-12      4:29: Ef 5:4, Kl 3:8, 3:16, 4:6, 1 Te 5:11

<sup>30</sup> Eghti ia Godin Duam osimtizim a daningan marki. Ia fo, God ia an gumazamizibar otivasa, a uan Duam ia ganingi. Eghti a ian akaghti ia fogh suam, ia guizbangira an gumazamizibara, egh dughiar a uam ia iniamimin a ia damighti ia bar firighregham. <sup>31</sup> Ia arazir kurar kaba atakigh: navir kurar igharazi tavin itir arazim, ko aningagharim, ko adarir arazim, ko pamtem dagarvagha uari adoghadozir arazim, ko akar kuraba uari gasir arazim, ko igharaz darazir aghuaghuazir arazir maba sara. <sup>32</sup> Egh ia arazir aghuibar Kraisin adarasi me damu, egh men apangkuv. Egh uaghan uari uan arazir kuraba gin amang, mati God Kraisin ingangarimin tuavimin, ian arazir kuraba gin amadi.

## 5

### *E angazangarimin* aven daruam

<sup>1</sup> Ia God bar ifongezir boriba, kamaghin ia an amir arazibar gin mangi. <sup>2</sup> Ian arazir ia amiba, arazir gumazamizibagh ifongezir arazim gisin tugh, mati Krai bar e gifuegha e bagha uabi anigha areme. Kamaghin an ovevem mati ofan mughuriar aghuir God ifongezim. <sup>3</sup> Ia Godin gumazamizibara. Kamaghin ia, gumazamiziba tintiniba uari bakia uari isava akuir arazim, ko arazir miziriziba, ko igharaz darazir bizibar ganiva dagh ifongamin araziba, ia arazir kabar amuan marki. Egh uaghan ia arazir kabar migirigiaba tong ian tongin otivan marki. <sup>4</sup> Egh ia akar miziriziba ko akar onganiba ko asuir migirigiar kurabar amuan marki. Kar uaghan ia damuamin araziba puvati.

---

4:30: Ais 63:10, Ro 8:23, Ef 1:13-14, 1 Te 5:19      4:31: Kl 3:8, 3:18-19, Ta 3:2-3, 1 Pi 2:1      4:32: Mt 6:14, 18:22-35, Mk 11:25, 2 Ko 2:10, Kl 3:13      5:1: Mt 5:48, Lu 6:36      5:2: Kis 29:18, Wkp 1:9, Sng 40:6, Jo 13:34, Ro 14:15, 2 Ko 2:15, Ga 2:20, Hi 7:27, 10:10, 1 Jo 3:11, 3:23      5:3: Ro 6:13, 1 Ko 5:1, 2 Ko 12:21, Kl 3:5, 1 Te 4:3      5:4: Mt 12:35, Ro 1:28, Ef 4:29

Arazir ia damuamimra kara, ia God minabi. <sup>5</sup> Ia kamaghin fogh, gumazamizir tintiniba uari isava akuir arazim gamiba, ko gumazamizir arazir mizirizibagh amiba, ko gumazamizir marazir bizibar gara ifuer arazim gamiba, (Arazir kam mati ia uari isa God ganidi moghin ia uari isa bizir ifongezibagh anidi), ezi gumazamizir kamaghin amiba, me God ko Krai Ativir Gumazamizibar tongin ikian kogham.

<sup>6</sup> Ia tav ateghti a ia gifar ia damuti, ia akar ifavaribar gin mangan marki. Arazir kurar kaba bagh Godin aningharim gumazamizir an akamin gin zuir puvatiziba me bativam. <sup>7</sup> Kamaghin, ia ifavarir gumazir kaba tong men poghan marki.

<sup>8</sup> Ia faragha mitatem in aven ike, egha datirighin ia Ekiamin gumazamizibar otivigha, egha angazangarimin aven iti. Kamaghin ia gumazamizir angazangarimin aven itibar min daru. <sup>9</sup> (Angazangarim arazir aghuiba ko Godin damazimin derazir araziba ko guizin akamin arazibagh ami, da otifi.) <sup>10</sup> Ia, arazir God damuti a bar akongeghamiba, ia da buri dagh fogh dar amu. <sup>11</sup> Ia arazir mitatem in itibagh amir gumazamizibar poghan marki. Men arazir kinir kaba, da gumazamizibar akurvazir puvati. Eghti ia men arazibar amuti, da azenan otogh, mati angazangarim dagh isirazi moghin, eghti me fogh suam, arazir me amiba, da ikufi. <sup>12</sup> Me amir arazir mogomeba, ki dar gun mikiman kogham. Ki dav mikiman bar aghumsiki. <sup>13</sup> Angazangarim bizibagh isiraghti, da azenim girighiti, gumazamiziba fogh suam, bizir kabar

---

5:5: 1 Ko 6:9-10, Ga 5:19-21, Kl 3:5    5:6: Ro 1:18, Kl 2:4, 2:8, 2 Te 2:3    5:8: Jo 12:36, Ap 26:18, Ro 1:21, 2 Ko 3:18, Ef 2:11-13, Kl 1:13, 1 Pi 2:9, 1 Jo 2:9    5:9: Ga 5:22    5:10: Ro 12:2, Fl 1:10, 1 Te 5:21, 1 Ti 2:3    5:11: Ro 6:21, 1 Ko 5:9-11, Ga 6:8, 2 Te 3:6, 3:14, 2 Jo 10-11    5:13: Jo 3:20-21, Hi 4:13



mingariba kamakin. <sup>14</sup> Bizitam bar azenim girigh egh a guizbangira angazangarimin min otogham. Kamaghin, marazi ghaze,

“Ni aremezir gumazim,  
ni ua dikafigh, mozim ategh  
egh uam azenan izi.  
Eghti Kraisin angazangarim ni gisiragham.”

<sup>15</sup> Kamaghin, ia uan daroriba deravira dar gan. Ia gumazamizir onganibar min daruan marki. Ia fofoziba itir gumazamizibar min daru. <sup>16</sup> Datirighin ia Godin arazibar amuamin dughiam iti. Ezi e datirighin itir dughiam, a gumazamiziba arazir kurabagh amir dughiam, a dughiar kuram. Kamaghin amizi, ia deravira gan, dughiar kam pura mangi givaghan kogham. Dughiaba vaghvagh ia arazir aghuibar amu. <sup>17</sup> Kamaghin ia arazir onganibar amuan marki. Egh arazir God damuti a bar akongeghamiba, ia da buri dagh fogh dar amu. <sup>18</sup> Ia wainin dipar avirim ramiva onganon marki, arazir kam ia gasighasigham. Ia Godin Duam ateghti a ia gizifagh.

<sup>19</sup> Egh ia uariv kimsi, Ighiabar Akinafarimin aven itir ighiaba ko, Godin ziam fer ighiaba ko, Godin Duam ian navir averiabagh atizir ighiaba, ia uariv kim. Egh ia ighiabar amuva, Ekiamin ziam fiva, uan navir averiabar aven, ziar ekiam a daning. <sup>20</sup> Egh ia zurara, en Ekiam Kraisi Iesusin ziamin, bizir otiviba bar, da bagh God Afeziam minabi.

### *Pol poroghamibav gei*

---

5:14: Ais 26:19, 60:1, Ro 13:11    5:16: Ga 6:10, Kl 4:5    5:17: Ro 12:2, Kl 1:9,  
1 Te 4:3, 5:18    5:18: Snd 20:1, Ais 5:11, 5:22, Lu 21:34    5:19: Sng 33:2-3,  
Ap 16:25, 1 Ko 14:26    5:20: Sng 34:1, Ais 63:7, Hi 13:15, 1 Pi 2:5

<sup>21</sup> Ia Kraisin apengan iti, kamaghin ia uarira uarir apengan ikiva uari baragh.

<sup>22</sup> Ia amizir paba itiba, ia Kraisin apengan ikiava a barazi moghin, ia uan pabar apengan ikiva me baragh. <sup>23</sup> E fo, Krais uan siosin dapanimin iti moghin, paba uan amuibar dapanibar iti. Ezi Krais uabi siosin Akurvazir Gumazim, ezi sios Kraisin nivafizimin min iti. <sup>24</sup> Sios Kraisin apengan iti moghin, ia amuiba uaghan zurara uan pabar apengan iki.

<sup>25</sup> Paba, ia uan amuiba bar me gifongegh, mati Krais uan sios gifongegha a bagha uabi isava a ganigha a bagha areme. <sup>26</sup> Krais kamaghin ifonge, an akamin tuavimin, a uan sios isi dipamin a rueghti a Godin damazimin zuegham. <sup>27</sup> A kamagh sua, a sios damighti an an damazimin bar aghungigh, egh bar zueghiva, arazir kuratam puvatigh, egh duar kuriba ko seghsariba puvatighiva, egh bizir kurar maba sara uaghan puvatigham. Kamaghin Krais a bagha uabi isa a ganingi. <sup>28</sup> Ezi kamaghira ia gumaziba uan nivafizibagh ifongezim moghin, ia uan amuibagh ifongegh. Gumazir uan amuim gifongezim mati a uabi gifonge.

<sup>29</sup> E fo, tav uabi uan nivafizimin apanim gamir pu. Puvati, a dagheba a ganigava an akurvasi, mati Krais siosin akurvasi. <sup>30</sup> E fo, erara, e Kraisin nivafizimin aven itir soroghafariba ko bizibar min iti. <sup>31</sup> Godin Akinafarimin aven itir osizirim kamaghin migei,

“Kamaghin, gumazim uan ameboghfeziaba ategh mangi, uan amuimin porogh egh

---

5:21: Fl 2:3, 1 Pi 5:5    5:22: Stt 3:16, Ef 6:5, Kl 3:18, 1 Pi 3:1    5:23: 1 Ko 11:3, Ef 1:22-23, Kl 1:18    5:25: Ga 1:4, Kl 3:19, 1 Pi 3:7    5:26: Jo 15:3, 17:17, Ta 3:5, Hi 10:10, 10:22, 1 Jo 5:6    5:27: 2 Ko 11:2, Ef 1:4, Kl 1:22    5:30: Ro 12:5, 1 Ko 6:15, 12:27, Ef 1:22-23    5:31: Stt 2:24, Mt 19:5, Mk 10:7-8, 1 Ko 6:16

aning nivafizir vamiram otogham.”

<sup>32</sup> Akar mogomer kam, a mingarir ekiam iti. Ezi ki uabi kamaghin nighnisi, a Kraiss uan sios ko aning geghari. <sup>33</sup> Ezi akar kam a uaghan ia migia ghaze, ia gumaziba vaghvagh uarigh ifongezi moghin uan amuibagh ifongegh. Eghti ia amuiba vaghvagh uan pabar apengan iki me baragh.

## 6

### *Pol boriba ko ameboghfeziabav gei*

<sup>1</sup> Ia boriba, arazir aghuir ia damuamimra kara, ia Ekiam ko porogh egh uan ameboghfeziabar akaba da baragh.

<sup>2</sup> Godin Akinafarim ghaze, “Ia uan ameboghfeziabar apengan ikiva men akabar gin mangi.” Akar gavgavir kam, an akar gavgavibar tongin ikia, egha dar faraghavira akar dikirizim sara iti. <sup>3</sup> Akar dikirizir kam kamakin, “Ia kamaghin damuti, ian dabirabim bar deraghti ia nguazir kam dughiar ruarimin an ikiam.”

<sup>4</sup> Ia afeziaba, ia uan boribar nighnizibagh asighasigh me damuti, me ataran marki. Egh ia deravira men ganiva Ekiamin damazimin men kuariba iniva men araziba akiriva, Ekiamin arazibar men sure damu.

*Pol ingangarir gumazir kiniba ko men gumazir ekiar men garibav gei*

<sup>5</sup> Ia ingangarir gumazir kiniba, ia uan gumazir ekiar ian garibar men atiatingiva, men akaba baraghiva men apengan iki. Egh ia ifaran kogh, egh navir zuruzimin ingangarim damu, mati ia Kraissin akam baragha an ingangarim gami. <sup>6</sup> Ia fo, ian gumazir ekiar ian gariba ian gan suam, ia ingangarim deraviram a gamizi me ia gifonge.

6:1: Snd 23:22, Kl 3:20  
Snd 19:18, 22:6, Kl 3:21

6:2: Mt 15:4

6:4: Lo 4:9, 6:7, 6:20-25, Sng 78:4,

6:5: 2 Ko 7:15, Fl 2:12, Ta 2:9-10, 1 Pi 2:18

Egha ia kamaghin nighnighan marki, me ian garir dughi-abara, ia ingangarir aghuim damuam. Puvati. Ia Kraisin ingangarir gumazir kinibara, kamaghin ia God ifongezi moghin ia uan nighniziba bar da isi ingangarim daningiva a damu. <sup>7</sup> Kamaghin ia ingangarir gumazir kinibar min ingangarim damuva, ian naviba bar akongegh suam, e uan gumazir ekiar en gariba me baghavira ingangarim gamir puvati, e Ekiam bagha ingangarim gami. <sup>8</sup> Ia ingangarir gumazir kinibar min iti, o ia tavin apengan ingangarim gamir puvatiziba, ia kamaghin fogh, gumazamizir ingangarir aghuibagh amiba, Ekiam da bagh ivezir aghuiba bar vaghvagh me daningam.

<sup>9</sup> Kamaghira ia, men garir gumazir ekiaba, ia uaghan arazir aghuiba uan ingangarir gumazir kiniba me damu. Ia atiatir araziba me damuan marki. Ia zurara bizir kam ginighnigh, ia ko ian ingangarir gumazir kiniba, ia bar Gumazir Ekiar Ian Garir vamira iti, egha a uan Nguibamin pin iti. An arazir vamira gisin tugha gumazamiziba bar me tuisisi.

*Kraisin* adarasi mati midorozir gumaziba

<sup>10</sup> Nan migirigiar abuananaba, ezi ki kamaghin miki-masa, ia Ekiamin poroghti an gavgavir ekiam ia damuti ia tuivigh gavgavigham. <sup>11</sup> God ia ganidir midorozir biziba, ia bar dar aghuigh dar suikigh. Kamaghin ia tugh gavgavigh Satanin ifavarir nighnizir kuraba da munasam. <sup>12</sup> Ia deravira nighnigh, e gumazamizir igharaziba ko uariv sozir puvati. E duar kurar overiamin itiba ko uariv sosi. Duar gavgavir gumazamizibagh ativiba, ko aser gavgaviba itiba, ko nguazir kamin garir adariaba, duar kurar kaba

---

6:8: 2 Ko 5:10, Ga 3:28, Kl 3:11      6:9: Lo 10:17, Ro 2:11, Kl 3:25, 4:1      6:10:  
1 Ko 16:13, Ef 1:19, 3:16, Kl 1:11      6:11: Ro 13:12, 2 Ko 6:7, 10:4, Ef 4:14, 1 Te  
5:8      6:12: Jo 12:31, 14:30, Ro 8:38, 1 Ko 15:50, Kl 2:15, 1 Pi 5:8-9

dughiar mitater kamin aven ingarima e da ko uariv sosi. <sup>13</sup> Kamaghin ia God ia ganingizir midorozir bizibar suigh dar aghuigh. Egh arazir kuraba otivamin dughiam, ia tugh gavgavigh uan apanim munasi, mangi midorozim givaghamin dughiam, ia tugh gavgavigh mamaghira ikiam. <sup>14</sup> Ia tugh gavgavighsi, Godin guizin akam benimin min uan ivariam gikegh. Egh arazir aghuir ia zuraram amiba evarimin pizir korotiamin min anerugh. <sup>15</sup> Egh ia Akar Aghuim anakunsi zurara bar ifongegh, ezi arazir kam mati ia dagarir asuabar min da zui. Akar Aghuir kam kamakin, God e ko navir vamira ikiasa. <sup>16</sup> Egh dughiaba bar ia oramin min nighnizir gavgavim uaghan an suiragh, eghti gumazir kuram, Satan, a barir avim itiba ia gasavamangiti, eghti ia orar kamin amodoghin barir avir kaba mungam. <sup>17</sup> Ia God ian akurazir arazim ginighnigh, egh nighnizir kam mati ia dapanir asuar gavgavimin min anerughiti a ian dapaniba avegham. Eghti Godin akam, an Duam ia ganingizir midorozir sabamin min ia an suiragh. <sup>18</sup> Ia bizir kabar amuva, egh God ko mikim. Egh a ian akurvaghsi ia an azangsigh. Ia zurara, Godin Duam ian navibagh inivti, ia God ko mikim. Egh angamra iki gan, egh dughiatam God ko migeir arazim ataghraghan marki, egh zurara Godin gumazamiziba bar me bagh a ko mikim.

<sup>19</sup> Egh ia uaghan na bagh God ko mikim suam, God uan akam na danighti, eghti ki anakunsi, ki atiatingan koghiva, egh bighvira mikimam. Egh Akar Aghuimin nighnizir mogomem aghuram. <sup>20</sup> Ezi ki Akar Aghuim gumazamizir igharazibav kimasas, ki Kraiss Iesusin abuir

---

6:13: 2 Ko 10:4, Ef 5:16    6:14: Ais 11:5, 59:17, 2 Ko 6:7, 1 Te 5:8    6:15: Ais 40:9, 52:7, Nah 1:15, Ro 10:15    6:16: 1 Jo 5:4    6:17: Ais 49:2, 59:17, 1 Te 5:8, Hi 4:12, MAA 19:15    6:18: Mt 26:41, Lu 18:1, Ro 12:12, Kl 4:2, 1 Te 5:17, 1 Ti 2:1    6:19: Ap 4:29, 2 Ko 3:12, Kl 4:3-4, 2 Te 3:1    6:20: 2 Ko 5:20, Fl 1:20, Fm 9-10

gumazimîn iti, kamaghîn ki datirighîn kalabusîn iti. Eghti ia God ko mikim suam, ki an Akar Aghuimîn gun mikimsi, a gavgavim na danighti, ki atiatingan koghîva bighvira Akar Aghuim mikimam.

*God deravira* Efesusin itir Kraisin adarazir amuasa, Pol an azangsisî

<sup>21</sup> Tikikus, a mati en aveghbuar e bar ifongezim, a Ekiam baghavira ikiava an ingangarim gami. A na bativir bizibar gun ia mikimam. Eghti ia fogham, ki manmaghin iti. <sup>22</sup> Ki kamagh sua, an en ikirimirir e itimîn gun ia mikimiva gavgavim ian navibar aningam. Kamaghîn, ki ia bagha anemadi. <sup>23</sup> Ki ia bagha God ko miġia ghaze, God en Afeziam ko en Ekiam Krais Iesus, aning navir amirizim ko igharaz darazigh ifongezir arazim, ko nighnizir gavgavim sara, Kraisin adarazi me daning. <sup>24</sup> Eghtima, gumazamizir en Ekiam Krais Iesus gifuegha mamaghira itiba, Godin apangkuvim bar me ko iki.

Godin Akar Aghuim; Akar Dikirizir Gavgavir Igiam  
The New Testament in the Aruamu language of Madang Province,  
Papua New Guinea, 2004 Edition  
Nupela Testamen long tokples Aruamu long Madang Provins long  
Niugini long 2004

copyright © 2004 Pioneer Bible Translators and the Bible Society of Papua New Guinea

© Faith Comes by Hearing

Language: Aruamu

Translation by: Pioneer Bible Translators

### Godin Akar Aghuim in the Aruamu Language

This translation was produced by Pioneer Bible Translators, and was published in 2004 by the Bible Society of Papua New Guinea.

If you are interested in obtaining a printed copy, please contact the Pioneer Bible Translators at [www.pioneerbible.org](http://www.pioneerbible.org)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-03-04

---

PDF generated using Haiola and XeLaTeX on 5 Mar 2021 from source files dated 29 Dec 2019

8f6beb37-6783-55d5-91ed-8321cc3f5eea